



Venzone gist suenter il terratrembel.



La citad medieva Venzone è vegnida reconstruida crap per crap.

FOTOS MAD

# En memoria a l'acziun d'agid per il Friul

■ (anr/fa) Suenters ils fermes terratrembels en il Friul l'onn 1976 avevan gidà era 200 Grischnas e Grischuns. Dacurt èn els vegnids envidads da far ina visita a la regiun al nord da l'Italia. Suenters ils dus terratrembels sgarschavels da l'onn 1976 cun var 900 morts era i François Aebi, quella giada ravarenda al Comander a Cuiira, en il Friul. Turnà da quel viadi aveva'l quintà a ses amis e conoschents da quai ch'el aveva vis. In da quels amis era Ernst Denoth: «Aebi era da l'avis ch'i fiss da gidar la populaziun dal Friul, e cunquai ch'igl era atun cun temperaturas pli e pli fraidas ha'l gi l'idea da procurar in suttetg per la glieud pertutgada», sa regorda'l.

## Dus convois cun ina sesantina da rulottas

Il ravarenda Aebi, uss pensiunà, aveva organisà per pretschs favuraivels la cumpra da var 60 rulottas. Quellas rulottas han ins manà giu durant october e november 1976 en dus convois. «Igl era gia ina fradaglia en il Friul, uschia en las rulottas vegnidas retschevidas cun bratscha averta.» Quai è stà il cumenzament da l'acziun d'agid per il Friul. Per Nadal han ins ramassà en Grischun da tutta sorts da regals per ils pertutgads en Italia. Grazia als daners da la Lia Rumantscha era vegnì costruì a Trasaghis ina nova scola. Quest era stà però mo l'emprim pass dal project per gidar.



## Set chasas ad Avasinis

Tranter ils conoschents da Aebi era er l'architect barmier Thomas Aebli da Cuiira. Quel s'aveva laschà engaschar per construir ad Avasinis set chasettas cun elements prefabritgads. Durant las va-

canzas da stad, en tut set emnas, han lavurà 200 personas dal Grischun e da la Svizra Bassa ad Avasinis e conturns. Tranter quels eran inschigners, architects, falegnams, picturs, scolasts, medis e tgirunzas da malsauns, students ed em-

prendists. «Il pli retschertgads eran ils mastergnants», sa regorda Ernst Denoth, il qual aveva l'incumbensa da manar cun in bus natiers il material basegnà, sco aissas, guttas ed auter pli. La lavur vegniva manada da l'architect Aebli. Las gidan-

tras ed ils gidanters pernottavan en las rulottas che na vegnivan betg pli duvradas. «Quellas han ins suenter vendì per l'import dad oz ca. 200 000 euros, ils quals èn vegnids reinvestids ad Avasinis.»

## Mantegnì il contact fin al di d'oz

Duas personas che s'han engaschadas ferm dal cumenzament davent eran Gieri Darms barmier da Samedan ed Andrea Compagnoni da Poschiavo. «Dacurt s'ha mess l'antierur sindaco da Trasaghis Ivo Del Negro en colliaziun cun Compagnoni e ditg ch'i fiss bel da sa scuntrar puspè ina giada cun ils gidanters da quella giada», di Ernst Denoth. El ha gidà Compagnoni, il qual ha uss passa otganta onns, ad organisar l'inscunter. Da la partida era er François Aebi. «Questa fin d'emna avain nus 22 antierurs gidanters ensemen cun il Coro misto da Poschiavo fatg in viadi tras il Friul reconstruì, sco p. ex. a Venzone, a Trasaghis ed oravant tut ad Avasinis cun las set chasettas ch'èn anc adina abitas.» La sonda saira ha mussà Aebi films da quellas lavurs da l'onn 1977 ad Avasinis. Ida a fin è la visita dumengia cun ina messa en il dom da Gemona cun participaziun dal Coro misto dal Poschiavo. «Igl è stà impressiunant quant engraziavels ch'els èn anc adina per l'agid che nus avain prestà, ed era che l'amicizia s'ha mantegnida durant tut quest onns», di Ernst Denoth.

Ilis organisateurs da l'inscunter Andrea Compagnoni (san.) ed Ivo Del Negro circundeschan il sindaco da Trasaghis.